

大學的理想VS現實

文：講野很細聲的人

排：oi

圖：google

唔知你哋對於大學係一個咩概念？去過大學開放日，你可能會覺得：嘩！啲Hall好正喎／啲人話呢科都唔係咁難讀／好似大學冇中學咁chur？到Reg Day又有人同你講：我哋棟Hall咁近上堂地方，唔使驚遲到喎！玩完OCamp，（讀男／女校嘅）你可能會覺得：嘩！我成世都未見過咁多囡／囡架！Dry咗咁多年，今次仲唔到我出pool？當你連試都未考過就驚梗GPA嘅時候，組爸媽會同你講：過三爆四好容易喇咋，上堂俾心機聽書就得喇。見到其他人走堂當食生菜嘅時候，你可能會拍晒心口話：我肯肯定唔會走堂嘅！

如果你真係咁諗／講過，恭喜你，你FF得太多喇！小編就係一個「太年輕，太幼稚」嘅例子，經歷咗一年嘅大學生活，世事都被我看透了。

你以為大學冇中學咁chur咩？你以為入咗大學就八仙過海，快活過神仙？冇錯，大學冇咗折磨足三年嘅IES，又唔使由朝上堂上到晚。但係，一個SEM要面對三份等同IES Level嘅Essays呀！臨近Deadline嗰陣，做死線戰士嘅同胞們落咗堂就搵hall／24／拉把問候essay娘親啊！一路做，一路望住個太陽升上嚟（此刻小編的心情是崩潰的）然後係做紙期間不斷問：到底邊一個話入咗U就好輕鬆架，呃人嘅！

你以為住得近就唔會遲到？咁你就真係太天真喇。你知啦，懶係人嘅天性，賴床係人嘅本能，大家永遠都唔會嫌棄床同枕頭呢對好朋友。所以呢，小編好肯定咁話你知，SEM頭都仲勉強可以比上堂提早一個鐘或者更多起身食個靚早餐（如果你咁慘係早堂），唔使過多兩個星期，九半上堂，你就會較九點嘅鬧鐘。你妄想自己可以九秒九搞掂晒去上堂，但現實就係你dog rush衝到LKK／LBY／WYL樓下發現部lift啱啱上咗去，仲要係3樓！然後你開始跑樓梯，雖然你希望自己可以好似劉翔咁快，然而你只是個凡人。最後你都係遲咗到，你發誓以後唔會再遲到，然而，人類總要重複同樣的錯誤。

你以為Dry咗咁多年，入咗U就出到pool？冇錯，大學係多人過中學多多聲，但係都要睇咩U架。好似嶺南咁，女校嚟講，佢敢認第二，冇人敢認第三！兩千六人有接近兩千二係女仔，可能男同學們會覺得被女圍真好，但係真係出到pool嘅又有幾多對？一早出咗池嘅有，唔想拍拖嘅亦有，鍾意收兵嘅都有。女仔更慘，係campus見到（你覺得係）靚仔唔係名草有主就係對女性冇興趣（根據非正式統計），都咪話唔灰。仲有部分shyshy嘅朋友仔呢，有冇人理過佢地嘅感受！

毒就唔值得被愛啦咩！歐高榮就大晒？（下刪怨言一萬字）傻豬豬嘅你懷住入U再出池嘅理想入到嚟嶺南，結果A0 Grad。小編溫馨提示：大學男女有好多種，不過唔係個個都適合你_____。

當你真係信咗組爸媽嘅山埃勵志加油說話，又真係好俾心機上堂聽書，結果到放GPA嗰日一開portal——唔過3！又話過三爆四好容易，我個3呢！呢個世界已經冇嘢再值得我相信。這就是現實，係「你以為」嘅時候，Killer們已經一刀一刀割落你條頸度。你永遠都唔知自己點解LCE會拎C Range，就好似UFO係咪真係存在一樣，都係一個謎。可能係你平時上堂成日答佢問題，又或者係你平時上堂成日唔答佢問題，簡單啲嚟講係點都死，係睇吓你身下有幾多人墊住你啫。因此，GPA過唔過3呢就睇你人品好唔好了。（按：小編落筆之時正值派GPA之日，事實證明，你以為佢會kill咩？佢偏唔kill，真係估佢唔到。）

唔知你有冇試過拍晒心口話「我打死都唔會走堂嘅」之類嘅說話？又唔知講過呢啲嘢嘅同學仔仲係咪一堂都未走過呢？小編就唔係了。說來慚愧，本人也曾誇下海口話自己唔會走堂，結果開SEM第一個星期嘅第一堂tutorial，我唔小心就走咗，真係「今天的我打倒昨日的我」。可能睇緊呢度你會話：「車！較鬧鐘咪唔會唔知醒囉！」你講得啱呀，小編嗰陣都天真咁以為一個鬧鐘可以叫醒自己，中學都得啦，宜家都應該得……掛。結果，就係太相信自己唔會鬧鐘一響馬上撒熄佢，所以小編第一堂就係因為咁走咗。之後就開始較兩個鬧鐘、三個鬧鐘、四個鬧鐘……當你睇透咗嗰陣，你就會變得淡定，然後繼續瞓，而當初嗰個話唔會走堂嘅仁兄，已經被遺忘係大明湖畔了。

以上皆是小編由憎盛盛中學牛升大學之後發現嘅事實，為免各位又pure又true嘅freshmen bb以為入咗嚟就美夢成真，結果發現原來係地獄，所以小編先殘忍地將現實寫出嚟！大學真係冇你想像中咁美好，唔好以為打完DSE呢隻大佬就脫苦海，因為仲有更大嘅boss係後面排緊隊；A0要破蛋都唔係咁easy；過三爆四？睇住個GPA爆到「hing hing hum hum」就真；想做好學生唔走堂？除非個professor係美國隊長喇。

你只係由一個地獄跳去第二個地獄咋，傻豬。